

Ranzgaeuq Leiz Yinh

□ Cungh Hihcwnggh / 钟希增

Song baih ranghndoi hen
Seiqhenz caenh ndoengfaex
Gyangdoengh cungj nazreih
Denh neix ndei guh gwn

Raeblaeng baengh Ndoengsim
Dangqnaj cim Gyaeufoux
Yienghyiengh ndaej mbwn caeuh
Mbanj gaeuq ok vunzgvai

Mbanjdatsangj iquetet, ngamq geijcib ranz vunz, daengx mbanj deng go maknganx maklaehcei cw raemh-rwd bae, yo youq ndaw ndoeng caemrwg, mbouj daih miz vunz rox. Hoeng denh neix cix miz aen ranz gaeuq cukcuk miz 200 bi nanz lij henhoh ndaej gig ndei mboujcaengz deng vaih saekdi ndeu, aen de couh dwg ranzgaeuq boux hak hung Cwngfuj Cungguk Gaeuq Leiz Yinh sienseng.

Ngoenz de, dou geij boux doxiu hai ci bae Mbanjdatsangj yawjngonz aen ranzgaeuq Leiz Yinh. Daj Hawnazheuj aen haw youq ceiq baihnanz Namzningz neix hai ci bae, ndij diuz roen gaebgeb, ngutngeuj, lingqgit ndeu veihveih hai bae, daih-iek gvaq le saek cibbaj ngeihcib faencung, ci hai daengz aen gemhndoi ndeu. Aenvih roen haeuj mbanj ndaw ndoeng yiemj lai, dou hai ndaej gig menh, sawqmwh dingqnyi sing raemxlae caca cienz haeuj cueng ci daeuj. Dou dingz ci roengzdaeuj yawj, cij raen laj gemh miz diuz rij iq ndeu raemx dit roengz dat bae sangj-cumcum, ndei yawj dangqmaz. Sim gou baez saenqdaenh, sawqmwh ngeix daengz, Mbanjdatsangj aen cohmbanj neix daihgaiq couh dwg daj aen dat neix ndaej daeuj. Baez gvaq gemh bae couh yawjraen mbanj lo, aen ranz-gaeuq Leiz Yinh daengj youq gyang mbanj, bakgvaengh song henz ranz-bam cien caep sangsad, yawj bae gyaqciq yienhsag.

Dou ganjgip ganj haeuj mbanj bae, haeuj ranzgaeuq Leiz Yinh bae.

Goenglax baetranz ndeu raen dou daeuj daengz, gag ce sauqbaet daeuj bang dou guh daujyouz. De naeuz dou nyi, aen ranzgaeuq neix dwg youq mwh Ciuzcinghaucuz bi 1820 hwnjguh, daengz seizneix gaenq cukcuk miz song bak bi nanz lo. Gizneix dwg denh ndei, “Cienzmienh Ndoigyaeufoux, Boihlaeuh Ndoindoengsim, Song duzguk lungz-gim, Yamq din daengx seiqgyaiq” ha! Daj bi 2014 hwnj, aen ranzgaeuq Leiz Yinh neix ndaej Namzningz Si dawzdaeuj guh vwnzvuz baujhoh danhvei, baij vunz cienmonz baetsauq guenjieix, bibi bued cienhangh ngaenzcienz roengzdaeuj hawj coih ranz.

Ranzgaeuq dep ndoi caepguh, daj laj dinndoi daengz bangxndoi baenz mbaek baenz mbaek caep hwnjbae, seiq mbaek ranz geb seiq mbaek daizhongh lumj mbaeklae nei soh baiz



hwnjbae, mbaekmbaek nyaenxyup cingjing caezcaez. Diuz roenbyaij daj bakgvaengh ndij cungqgyang sohsah hwnjbae, mbaekmbaek ranz song henz dwg song fungh rug, gya hwnj fungh dou fungh gwnz bam hunghung iqiq daengxheij 20 geij fungh ranz. Mbaek ranz caeuq mbaek ranz cungqgyang dwg aen daizhongh ndeu, daizhongh ciep gwnzmbwn doeng lajdeih, baenz cungj ranz yiengh hingzik “comz raemx haeuj ranz” ndeu, neix miz cungj gangjap ndeu naeuz——“cienzcaiz fukloeg comz haeuj ranz, ciuh lwg ciuh lan yiengj mbouj caenh”.

Hamj gvaq giemxdou sangsad, yamq haeuj gij rinndaek camh baenz mbaeklae haenx, ndaej roxnyinh daengz aending ranzgaeuq Leiz Yinh youh gvangq youh rongh, song mbiengj rug gak mbiengj gag hai aen vacueng yienghgauq ndeu. Rin demh cueng, rin demh saeu, daufueng gyauejloz cungj deu va deu roeg veh lungz gaek fungh. Gwnz ciengz gyauej roqrantz veh gij dozanq gitleih lij gyumqgywt yawj ndaej raen. Mbaeklae roen byaij ndawranz cungj dwg baenz diuz rinndaek cag seiqfueng camh baenz, gij saeufaex ndawranz cungj dwg daengj youq gwnz doenrin, daengxcuh ranz cungj yienh’ok gij yiengh gyaundeidei gaeuqgeq ciuhlaux.

Ranz gaeuq neix gaiq cien gaiq vax, diuz saeu diuz loz, cungj yawj ndaej ok ciuhgonq Ranzleiz dwg geijlai guh ndaej gwn geijlai hoengh-vuengh ha! Bangxciengz ndawranz, nem miz gij saeh ciuhvunz Leiz Yinh:

Leiz Yinh, aen coh yenzlaiz heuhguh Leiz Gaijcwz, bi 1886 ndwen 4 doekseng youq Mbanjdatsangj, mwh Minzgoz conienz vih deuzndoj Yenz Sigaij doengcaep gaij coh guh Leiz Yinh. Cinghaucuz Gvanghsi 26 nienz (bi 1900) haeuj Daihdangz Gyazfungh Suhyen doegsaw, 32 nienz (bi 1906) gauj ndaej haeuj Namzningz Fucungh Hagdangz, 34 nienz (bi 1907) ndaej Vangz Hingh sienseng gaisau gya-haeuj Cunghgoz Dungzwmwngzvei, Senhdungj yienz nienz (bi 1909) youq

Gveilinz haeuj deihfueg swci yenz-giusoj guhhong, doeklaeng youh haeuj Gvangjsih Fazcwng Hagdangz doegsaw.

Sinhhai Gwzming bauqfat le, Leiz Yinh fatdoengh gyoengq hagseng caeuq bouxbing roengzrengz coi Guengjsae doglaeb, de ndaej senj guh Gvangjsih laemzseiz swngjiyi vei-yiyenz. Bi 1914 Yenz Sigaij roengz-lingh yaek gaemhdawz Leiz Yinh, Leiz Yinh deuz bae Yizbwnj camgya gij hozdung fanj Yenz Sigaij, caemhcai q haeuj Dunghgingh Cwngfaz Dayoz bae hagsib.

Bi 1917, Leiz Yinh guh Gvangj-dungh ginhsuj cungjcanhyi, caemh-caiq ndaej boujsenj guh gozvei canhyiyen yiyenz.

Bi 1918, Leiz Yinh diuh bae guh Gveilinz dauyinj, de “Haengj cunz haeuj ndawbiengz, Doxceng de leix-swnh, Swnghecanj guh ndaej hwnj, Mbouj cwnj(cinj) gwn daih’ien”, cingczik haemq yienhda.

Bi 1922, Leiz Yinh bae camgya gozvei cangzvei, ndaej senj guh yenfaz gijcauj veijyenzvei veiyenz, caemhcai q louz youq Baekging guh Gozminz Dayoz gyaucangj, yauucangj. Bi 1928 bae guh Ha’wjbinh Cwngfaz Dayoz yauucangj. “Gouj · Itbet” saehbienq le, vunz Yizbwnj yaek hawj de guh “Manjcoughgoz” fazyen yencangj, hoeng de mbouj guh, laeglemx deuzdak dauqma Guengjsae.

Bi 1932, Leiz Yinh ndaej cingj bae guh Gvangjsih Swngjcwngfuj gauhgaep guvwn, bi 1933 daengz bi 1939 guh swngjcwngfuj veijyenz, minzcwngdingh dinghcangj. De camgya le sawqdingh caeuq gaenxmaenx doihengz gihcwngz baujgyaz cidu caeuq gaujsenj yencangj, lunzdih yanghcangj. Cawz gijneix le, de lij gimq ien gimq doj, ceihleix nduk-naeuh, caux hwnj canghaeux, ndaej daengz gyoengq lwgminz haenh ndei.

Bi 1941, Leiz Yinh guh gozfangz veijyenzvei dangjcwng gunghcoz gauj-hwz veijyenz giem cwngvucu cujyin, bi daihngaih guh gihcaz veijyenzvei veiyenz. Bi 1945 ndaej dangsenj guh

Gozminzdangj cunghyangh genhcaz veijyenz. Bi 1946 guh gauhdwngj gaujsi gibgek yinzyenz yencangj diuh-senj veijyenzvei veijyenz, bi 1948 guh lizfazyen lizfaz veijyenz, Suihcing Gih cwngvu veijyenzvei veijyenz, haijsaeh veijyenzvei veijyenz.

Bi 1949, Leiz Yinh riengz Ciengj Gaisiz bae Daizvanh Swngj le, caeuq vunz doxgap cujciz Gungj-Mung yozvei, fatyengz Cungguk vwnzva. De gaenx doegsaw, gaenx hagsib, raiz miz haujai saw okbanj, lumjnaeuz 《Gengcej Boiz Ngaenz Vwndiz》《Digoz Cuiyi Caeuq Cungguk》《Gij Laizyouz Saehhux Hoenxcienq Seiq-gyaiq》《Daibingz Denhgoz Caeuq Sinhai Gwzming》《Bohguk Gangj Cujdangj Caeuq Gij Yienzaen Gietgoj Gwzming Guh Baenz》《Gij Vwndiz Gyaucuz Fuengmienh Fukhwng Cunghvaz Vwnzva》daengj.

Bi 1972 ndwen 11, Leiz Yinh youq Daizvanh Swngj baenzbingh gvaqseiq, gyaue ndaej 86 bi.

Gij lwglwg lanlan Ranzleiz cungj ak dangqmaz, lwglan Leiz Yinh miz di bae Meijgoz, miz di louz youq Cungguk baenz boux gyaucuzgyah.

Seizneix aen ranzgaeuq gyaqciq gvangqlangh neix gaenq mbouj miz vunz youq lo, goenglax baetranz naeuz dou nyi, mwh ngamq gaijfang, yinzminz cwngfuj gaenq anbaiz geij ranz vunz hojndoj mbouj ranz youq haeujdaeuj youq geijcib bi gvaq, geij bi neix baengh dangj caeuq cwngcwz bang gungz, geij ranz vunz haenx cungj ndaej duetgungz baenz fouq gag hwnj ranz moq caemhcai q senj okbae gvaq saedcej vuenzyungz, doiq aen ranzgaeuq okdaeuj hawj cunhvej guh ranzcunhsij lo. Dou riengz goenglax baetranz haeuj fungh ranzcunhsij, baihdaw caen baij miz aen doiq-daemhaeux, aen muhrin, aen daemj-rok, aen gonhgen daengj doengh gij hongdawz ciuhgeq. Goenglax baetranz naeuz, lij miz haujai vunz baihrog daeuj ranzgaeuq neix yawjngonz. Gyoengqvunz aiq dwg vihliux yaek gamjsouj lizsij bienqvaq hung-loet, roxnaeuz yaek faenyengj gij cingsaenz caizfouq Leiz Yinh sien-seng, roxnaeuz siengj liujgaij liujgaij gij vwnzva guhnaz ciuhgeq.

Ranzgaeuq couh lumj goeng baeuqgeq bak bi raen lai rox lai nei naengh youq gyang mbanj, ndaej daengz vunz ndaw gyog, vunz mbanj-gwnz mbanjlaj, vunz daengxbiengz aeueiq.

Dou ngeix ha, aen ranzgaeuq Leiz Yinh gaenq baenz giz ginggyaeu caeuq dieggoek vwnzva gyaucuz, vunz haeujok ciemh bi ciemh lai lo, hoeng diuz roen haeuj mbanj neix cix gaebgeb ngutngeuj, youh lingq youh yungyieng, mbouj ndei haici haeujok. Caen maqmuengh cwngfuj sij ndaej anbaiz ngaenzcienz daeuj guh gvangq coih ndei diuz roen neix, guh maenh goekdae sezsij daeuj baujjang dangdieg ginghci vwnzva ndaej hwngfat.

Gou siengsaenq, aen ranzgaeuq neix ndaej daengz cwngfuj caeuq vunzlai doengzcae henhoh, itdingh ciengxlwenx mbouj vaih ciengxlwenx ndaej coi vunz bae hag ndei hag gvai, bae hag guh roxsoq, bae hag guh vunzsoh!